

四庫全書

史部

欽定四庫全書

史部

欽定國子監志卷四

首至

詳校官國子監司業臣納麟寶

編修臣程嘉謨覆勘

總校官檢討臣何思鈞

校對官主事臣陳文樞

謄錄監生臣張泰

欽定國子監志目錄

吏部十二

卷首

職官類一官制之屬

表

卷之一

聖諭一

褒崇

卷之二

聖諭二

訓示

卷之三

御製一

文一

卷之四

御製一

文二

卷之五

御製一

文三

卷之六

御製二

詩

卷之七

詣學一

親祀

卷之八

詣學二

臨雍

卷之九

廟制一

圖說

卷之十

廟制二

建葺

卷之十一

祀位一

聖位

卷之十二

祀位二

配饗從祀

卷之十三

禮一

釋奠

卷之十四

禮二

釋菜

卷之十五

禮三

釋褐

卷之十六

禮四

獻功

卷之十七

禮五

告祭

卷之十八

禮六

祭品圖說

卷之十九

禮七

祭器圖說

卷之二十

樂一

樂制

卷之二十一

樂二

樂章

卷之二十二

樂三

樂器圖說

卷之二十三

樂四

律呂表

卷之二十四

樂五

舞器圖說

卷之二十五

樂六

舞節表

卷之二十六

監制一

圖說

卷之二十七

監制二

建葺

卷之二十八

官師一

設官

卷之二十九

官師二

典守

卷之三十

官師三

儀制

卷之三十一

官師四

銓除

卷之三十二

官師五

題名表一

卷之三十三

官師五

題名表二

卷之三十四

官師五

金匱要略卷之三十六
目錄
題名表三

卷之三十五

生徒一

員額

卷之三十六

生徒二

考校

卷之三十七

生徒三

算學

卷之三十八

生徒四

勲蔭

卷之三十九

生徒五

鄉試

目錄
卷之四十

生徒六

甄用

卷之四十一

生徒七

外藩入學

卷之四十二

經費一

恩賚

卷之四十三

經費二

歲支

卷之四十四

經費三

俸祿

卷之四十五

經費四

廩給

卷之四十六

金石一

欽頒彝器圖說

卷之四十七

金石二

御碑

卷之四十八

金石三

題名

卷之四十九

金石四

諸碑

卷之五十

金石五

石鼓圖說

卷之五十一

經籍一

賜書

卷之五十二

經籍二

板刻

卷之五十三

藝文一

奏議一

卷之五十四

藝文一

奏議二

卷之五十五

藝文一

奏議三

卷之五十六

藝文二

應

制一

卷之五十七

藝文二

應

制二

卷之五十八

藝文二

應

制三

卷之五十九

藝文三

論著

卷之六十

藝文四

詩賦

卷之六十一

識餘一

紀事

卷之六十二

識餘二

綴聞

臣等謹按

欽定國子監志六十二卷乾隆四十三年戶部尚

書臣梁國治等奉

勅修纂先是監臣輯有太學志而援及唐宋以前
故實殊失限斷乃

詔重為改定所誌緣起斷自元明蓋

本朝國子監及

文廟皆因前代遺址其締構實始於元初也是

編所載

聖諭二卷以紀

褒崇先聖

訓示儒林之大法

御製詩文七卷備錄

列朝聖文

皇上宸翰

詣學二卷紀

親祀

臨雍之禮廟制二卷前列圖說後誌建葺年月規
制祀位二卷詳載殿廡及崇聖祠諸位號禮
七卷分記釋奠釋菜釋褐獻功告祭諸儀及
祭器圖說樂六卷分記樂制樂章律呂舞節
二表及禮樂諸器圖說監制一卷子目與廟
制同官師五卷載設官典守儀制銓除題名
表生徒七卷員額考校甄用及外藩入學者

具見焉經費四卷

恩賚歲支俸給備載焉金石五卷首以

欽頒彝器圖說

御碑次及每科題名古今碑刻而殿以石鼓圖說

經籍二卷具載

賜書及板刻之目藝文二卷則列諸臣章奏應

制詩文及諸論著詩賦識餘二卷曰紀事曰綴聞

於是識大識小罔不備賅而我

朝重道崇文作人訓俗之盛臚實誌美足以彪炳
萬古矣乾隆四十六年閏五月恭校上

總纂官

臣紀昀

臣陸錫熊

臣孫士毅

總校官

臣陸

費

墀

經筵講官戶部尚書臣梁國治等謹

奏竊臣等奉

勅纂輯國子監志陸續呈請

欽定成書茲已竣事恭呈

御覽臣等謹奉

表恭

進者臣聞學則三代與共所以明倫聖為百世之

師是焉求道以清以和以任必

素王乃集大成曰校曰序曰庠惟辟雍克兼衆制
故王者化民成俗必教學為先圖而多士成德
育材以京師為首善欽惟我

列祖締造鴻圖聿開文運倫軌既同於萬國規模丕煥
於三雍監二代而郁郁乎文崇四術而彬彬益
盛我

世祖定

先師之位號舍萊禮成葺萬仞之宮牆賜金儀渥

樂舞六羽箭韶九成立條教於成均頒卧碑於
鄉校特設滿洲司業俾教胄子

國書十八年景運維新千萬世文明大啓我

聖祖道隆三古仁覆萬邦循舊典以臨雍俾任子而八
監嚴助教之選頒訓飭之文宮懸之業簾增新
屬國之衣冠來學定羣賢之祀位升朱子於殿
廷泐

御贊於豐碑書聖經於貞石王師之興如雨再告

武成大勇所至若神益昭

文教蓋兼容并包業隆於三五故道洽政治澤潤乎寰

瀛我

世宗範圍曲成知周道濟湖傳心於惟精惟一爰釋奠

於

先聖先師廣

達孝之恩於

五王躋崇聖之稱於列爵

諸學則文更臨幸從祀則享列廡庭

謙尊而光定跪獻上香之禮益動而巽沛置員廣額之
恩分燈火於六堂列臯比於八學進士重題名
之碣信立賢之無方選材開拔萃之科慶同升
之逾格而且黉宮增舍鱣席同歡青海

獻功龍章載錫開俄羅斯之館蕃夷盡仰同文迎化導
使之馳秦隴遙呼

萬歲益撫辰凝績紹

列聖而頌重華握範膺圖兼三才而敷五福是以德昭

千羽格獸舞於

堯階因而瑞應卿雲黶祥氛於

闕里洪惟我

皇上繼

聖君而六七作祖述憲章頌

天子於億萬年顯謨永烈

存神過化上下天地同流懷

德畏

威南北東西咸服

詔易三層門宇黃鋪六樣琉璃染盛潔而犧牲成
禮器是故大備宗廟美而百官富

至聖足以有臨定

親祭三獻之儀論彝章六佾之禮列其琴瑟管磬鐘
鼓實其簋簠簠豆銅羹仿古案而鑄鐸鐘琢新
聲而成特磬定春秋二仲之律

金
賜尊彝十器之陳既屢新夫

廟堂復廣增其楹舍金聲玉振疊

垂訓誠之文復廟重簷

親榜門庭之額光騰

宸翰同欽藻鳳高翔春霽

慈雲復見槐龍交翠百職咸逮

恩倖盡飽霑濡諸生共讀

賜書更叨賜郵秩

廣經學祿逮耆年禮闈添中正之官賢無家食算
學重璣衡之政士許窺天惟

作君而作師克引恬而引養洵樹虞庠之極則益隆
漢觀之宏儀至於

四征不庭八荒在

宥載績

累朝之緒粵成邁古之功當

萬幾典學之餘紀

昭代宏文之盛

欽裁舊志紛更刪唐宋以前

御定新編緣起自元明之制十五門敷文序事燦如

星日之陳廿二史重道崇儒莫罄名言之妙生

民未有惟條理貫其始終來許昭茲斯

同揆賢於堯舜從此仰

德音而欽

聖訓聽聳橋門求掌故以凜

神謨文高籀鼓臣等職慙典樂學媿通經乏蘭臺著作之才效槐市頌揚之雅竭編摩於冊府庶幾興親炙之思懷鉛槧於直廬竊幸際

右文之世由太學來者見知遠勝於聞知得

聖人師之

文運益宏其

廣運臣等謹編成志書奉

表恭

進以

聞

欽定四庫全書

欽定國子監志卷一

聖諭

臣等伏惟褒崇聖道訓迪多士所以繼往開來
君師億兆是故三代之學義重明倫漢臨辟雍
禮兼饗射至於唐宋典制遞加雖意主風厲而
詞多粉飾欽惟

世祖章皇帝定鼎京師首

詔崇祀以著萬世道統之宗

列聖宗儒典學隆儀壘舉煌煌

綸綍

教思無窮我

皇上紹一貫之心傳綜百王之道法

德音流播寰宇嚮風國學承流近

光尤切猗歟盛哉書所謂

皇極敷言是彛是訓惟

帝其訓者與恭輯

聖諭為

褒崇一卷

訓示一卷

聖諭一

褒崇

世祖章皇帝諭旨

順治元年山東巡撫方大猷奏請崇祀

先師

諭禮部

先師為萬世道統之宗禮當崇祀昭朝廷尊師重道
至意本內所開各款俱應相沿期於優渥以成盛典
著該部查照一體飭行

順治二年國子監祭酒李若琳奏請加

孔子謚號

諭禮部工部

先師謚號信宜尊崇著羣稽往例確議具奏新牌就該監製造如議行禮工二部知道時禮科給事中龔

鼎孳亦言宜從若琳請因復

諭禮部

孔廟謚號加稱

大成至聖文宣先師孔子既監科考訂僉同准如議行一應禮儀還照明朝舊例不必更改該部知道

謹案

先師神位至順治十四年從給事中張文光請仍

稱

至聖先師孔子通行直省各學

順治八年

諭禮部釋奠大典允宜舉行其擇吉具儀以聞

聖廟作速修理該部知道

順治十四年

諭工部

文廟崇祀

先師孔子所闢典禮甚重今已年久傾圮若不速為

整理後漸頽壞葺治愈難因爾部錢糧匱乏所需工料未能措辦朕發內帑銀三萬兩特加修葺爾部即傳諭行

聖祖仁皇帝諭旨

康熙六年

諭禮部臨雍釋奠大典禮儀理宜舉行已有旨修理聖廟國學俟完時該部擇吉具奏

康熙二十五年

諭大學士等先賢先儒從祀位次應視其道德為先後
不可援師弟為定例其酌議奏聞

康熙四十九年總兵馬見伯奏致祭

文廟時武臣請照文臣一體行禮

諭大學士等嗣後祭

先師孔子時令武臣與文臣一體行禮於理甚合著
照馬見伯所請行

康熙五十一年

諭大學士等朕自冲齡篤好讀書諸書無不覽誦每見
歷代文士著述即一句一字於義理稍有未安者輒
為後人指摘惟宋儒朱子註釋羣經闡發道理凡所
著作及編纂之書皆明白精確歸於大中至正經今
五百餘年知學之人無敢疵議朕以為孔孟之後有
裨斯文者朱子之功最為宏鉅應作何崇禮表彰著
內閣九卿詹事科道會同詳議具奏

謹恭時大學士等謹議以朱子升配
大成殿西序

詔從之

世宗憲皇帝諭旨

雍正元年

諭內閣禮部

至聖先師孔子道冠古今德參天地樹百王之模範
立萬世之宗師其為功於天下者至矣而水源木本
積厚流光有開必先克昌厥後則

聖人之祖考宜膺崇厚之褒封所以追溯前徽不忘

所自也粵稽舊制

孔子之父叔梁公宋真宗時追封啓聖公自宋以後
歷代遵循而叔梁公以上則向來未加封號亦未奉
祀祠庭朕仰體

皇考崇儒重道之盛心敬修崇德報功之典禮意欲追
封五代並享蒸嘗用仲景仰之誠庶慰羹牆之慕內
閣禮部可會同確議具奏時大學士等以應封公爵
議上又

諭禮部五常為百行之本天地君親師人所並重而天地君親之義又賴師教以明自古師道無過於

孔子誠首出之聖也哉

皇考崇儒重道超軼千古凡尊崇之典無不備至朕蒙皇考教育自幼讀書心切景仰欲再加尊崇更無可增之處故勅部追封

孔子先世五代今部議封公上考前代帝王皆有推崇之典唐明皇封

孔子為文宣王宋真宗加封

至聖文宣王封

孔子父叔梁紇為齊國公元加封

孔子為大成至聖文宣王加封齊國公為啓聖王至
明嘉靖時猶以王係臣爵改稱為

至聖先師孔子改啓聖王為啓聖公王公雖同屬尊
稱朕意以王爵較尊

孔子五世應石封王之處著詢問諸大臣具奏

謹案時內閣禮部及諸大臣遵

旨議

孔子五世俱封王爵得

旨允行

又

諭禮部

孔子道冠古今為萬世師表薄海內外無不俎豆尊

崇國學乃四方表率其制尤重

聖祖仁皇帝臨雍釋奠典禮優隆朕續承大統景仰先
型羹牆如見念國學為造士之地聖教所被莫先於

此恐歷歲既久有應加修葺之處爾部會同工部詳
加閱視凡

文廟殿宇廊廡及講堂學舍務須整理周備俾廟貌
聿新以申景慕朕將親詣焉

雍正二年

諭禮部帝王臨雍大典所以尊師重道為教化之本朕
覽史冊所載多稱幸學近日奏章儀注相沿未改此
臣下尊君之詞朕心有所未安今釋奠伊邇朕將親

詣行禮嗣後一應奏章儀注稱幸非宜應改為詣字
以申崇敬

又

諭禮部等衙門治天下之要以崇師重道廣厲澤宮為
先務朕親詣太學釋奠

先師禮畢進諸生於彝倫堂講經論學凡以明道術
崇化源非徒飾園橋之觀聽也惟

孔子道高德厚萬世奉為師表其祔享廟庭諸賢皆

有羽翼聖經扶持名教之功然歷朝進退不一而賢
儒代不乏人周程朱蔡外孰應升堂祔享者並先賢
先儒之後孰當增置五經博士以昭崇報均闕大典
九卿翰林國子監詹事科道會同詳考定議以聞時
九卿等議復林放等十一人從祀又

諭九卿等先儒從祀

文廟關係學術人心典至重也宜復宜增必詳加考
證折衷盡善庶使萬世遵守永無異議爾等所議復

祀諸儒雖皆有功經學然戴聖何休未為純儒鄭衆
盧植服虔范甯謹守一家言轉相傳述視鄭康成之
淳嘖深通似乎有間至若唐之陸贄宋之韓琦勲業
昭垂史冊自是千古名臣然於孔孟心傳果有授受
而能表彰羽翼乎其他諸儒是否允協以及宰予冉
有增置博士之處著再公同確議務期至當不易具
奏

謹舉九卿遵議止復祀
林放等六人遂為定制

又

諭內閣朕惟

孔子道高德厚為萬世師表所以維世教立人極者
與天地同其悠久朕臨御以來思極尊崇之典用申
仰止之忱今闕里

聖廟被災宜朕尊師重道之誠有未至歟朕在諒陰
之中素服齋居無庸更事減膳撤樂謹擬親詣國學
文廟虔申祭奠宣讀告文以展朕跼蹐不安之誠先

期齋二日於二十七日不設鹵簿朕隨身素服前往
諸王大臣官員陪祀者亦皆常服從事仍遣官馳赴
闕里祭告以慰

神靈幸新建

崇聖祠無恙

聖像神牌不至露處朕心稍寧遣工部堂官一員會
同該撫作速計材料工擇日興修務期規制復舊廟
貌重新告成之日朕將親詣行禮該部遵旨速行

又

諭禮部等衙門朕念先賢先儒扶持名教羽翼聖經有關學術人心爰命九卿詳議今諸臣參考周詳評論公正甚合朕心著依議行

又

諭禮部等衙門先賢冉雍冉伯牛子張有若四人後裔均著增置五經博士一人予以世襲

謹案時禮部等衙門遵
旨議奏增祀者二十八人增入

崇聖祠者一人增
置博士者四人

雍正三年

諭內閣九卿古有諱名之禮所以昭誠敬尊崇也朕
臨御以來恐臣民過於拘謹屢降諭旨凡與御名聲
音相同字樣不必迴避近見各省地名以音同而改
易者頗多朕為天下主而四海臣民竭誠盡敬如此
況

孔子德高千古道冠百王正彝倫端風化為往聖繼

絕學為萬世開太平自天子以至於庶人皆受師資之益而直省郡邑之名有

聖諱字在內者今古相沿未改朕心深為不安爾等會議凡直省地名有同

聖諱者或改讀某音或另易他字至於常用之際於此字作何迴避一併詳議具奏時部臣議迴避

聖諱凡遇姓氏俱加偏旁為邱字地名則更易他

名至書寫常用之際則從古體正字又

諭禮部等衙門朕細思今文出於古文若改用卽字是
仍未嘗迴避也此字本有期音查毛詩及古文作期
音者甚多嗣後除四書五經外凡用此字並用邱字
地名亦不必改易但加偏傍庶乎允協足副朕尊崇
先師至聖之意

雍正四年

諭禮部儀注內開獻帛進酒皆不跪朕今跪獻非誤也
若立獻於

先師之前朕心有所不安可記檔案以後照此遵行

雍正五年

諭內閣三月十八日為

皇考聖祖仁皇帝萬壽聖節舊例於是日虔誠齋肅禁

止屠宰今應永遠遵行

至聖先師孔子師表萬世八月二十七日為

聖誕之期亦應虔肅致敬朕惟

君師功德思被億載普天率土尊親之戴永永不忘而

於

誕日尤當加謹以展恪恭思慕之忱非以佛誕為比擬也著內閣九卿會同確議具奏

謹恭時大學士等遵議請永著為令
詔從之

又

諭禮部朕惟

孔子以天縱之至德集羣聖之大成堯舜禹湯文武相傳之道具於經籍者賴

孔子纂述修明之而魯論一書尤切於人生日用之
實使萬世之倫紀以明萬世之名分以辨萬世之人
心以正風俗以端若無

孔子之教則人將忽於天秩天叙之經昧於民彝物
則之理勢必以小加大以少陵長以賤妨貴尊卑倒
置上下無等千名犯分越禮悖義所謂君不君臣不
臣父不父子不子雖有粟吾得而食諸其為世道人
心之害尚可勝言哉惟有

孔子之教而人道之大經彝倫之至理昭然如日月之麗天江河之行地歷世愈久其道彌彰統智愚賢不肖之儔無有能越其範圍者網維既立而人無踰閑蕩檢之事在君上尤受其益易曰君子以辨上下定民志禮運曰禮達而分定使非

孔子立教垂訓則上下何以辨禮制何以達此

孔子所以治萬世之天下而為生民以來所未有也使為君者不知尊崇

孔子亦何以建極於上而表正萬邦乎人第知

孔子之教在明倫紀辨名分正人心端風俗亦知倫
紀既明名分既辨人心既正風俗既端而受其益者
之尤在君上也哉朕故表而出之以見

孔子之道之大而

孔子之功之隆也

雍正七年大學士等以闕里

大成殿上梁慶雲呈現奏請

宣付史館

諭內閣朕平素尊崇

先師至誠至敬雍正二年闕里

文廟不戒於火比時廷臣援明代弘治前事為言而朕心悚懼不寧引過自責親詣太學

文廟虔誠告祭特發帑金命大臣等督工修建凡殿廡制度規模以至祭器儀物皆令繪圖呈覽朕親為指授遴選良工匠材興造虔恪之心數年以來無時

稍間今

大成殿上樑前二日慶雲現於曲阜鄉等歸美朕躬
之詞朕不克當或者

上帝

先師鑒朕悚惕誠敬之心現茲雲物昭示瑞應朕不
敢矜言祥瑞但能功過相抵朕之幸也應擇日躬詣
太學

文廟告祭以申感慶之衷一切禮儀著該部速議具

奏朕躬被

先師之福佑普天士子誦法服膺同受

聖人之澤著將明年會試取中額數廣至四百名壬子科各省鄉試每正額十名加中一名其十名之外有零數者亦加中一名此朕體奉

先師樂育之盛心特行造就人才之曠典諸士子其各興文敦行益加勉旃所請宣付史館之處知道了

雍正十一年

諭禮部朕詣

文廟行禮應親自上香嗣後如何上香之處爾部會

同大學士議奏

謹案時禮部定議嗣是
迎神後行三上香禮

皇上諭旨

乾隆二年

諭禮部

至聖先師孔子天縱聖神師表萬世尊崇之典至

我朝而極盛

皇考世宗憲皇帝尊師重道禮敬尤隆闕里

文廟

特命易蓋黃瓦鴻儀炳煥超越前模朕祇紹先猷美牆
念切思國子監為首善觀瞻之地辟雍規制宜加
崇飾大成門大成殿著用黃瓦崇聖祠著用綠瓦
以昭展敬至意

又

諭禮部

先師孔子聖集大成教垂萬世我

皇祖聖祖仁皇帝

皇考世宗憲皇帝

親詣辟雍登堂釋奠儒臣進講經書諸生園橋觀聽雍
雍濟濟典至盛也朕祇承丕緒嚮慕心殷國學

文廟特命易益黃瓦以展崇敬俟工程告竣之日
朕躬詣釋奠用昭重道隆師作人造士至意應行

典禮爾部詳議具奏

乾隆三年

諭內閣本年春祭

文廟朕降旨親詣行禮查

文廟春秋二祭舊例俱是遣官我

皇考尊師重道始定親祭之禮間年舉行乃從前所未
有者今覽太常寺奏進儀注朕躬獻爵一次其亞
獻三獻之爵預先陳設香案上朕思既行親祭仍

當從三獻之儀著太常寺另繕儀注進呈

乾隆十二年

諭內閣翰林院檢討阮學浩所奏貢生閻若璩

孔廟從祀末議十一條朕初加披閱大概多前人
所已經議及非有卓然至當不易之論有裨典制
必當見之施行者即如議樂舞宜用八佾籩豆宜
用十二一條其意謂尊崇祀典宜用天子禮樂夫
孔子道德高厚與天地參即備天子禮樂以奉之

亦未足以昭崇報我朝

列聖隆禮致敬於

先師至矣盡矣而樂佾仍用六佾非畧而未講也

朕謂季氏八佾舞於庭

孔子斥其是可忍也孰不可忍今願以

孔子所非者祀

孔子是得為敬

孔子乎在他人則議之在已則受之於聖人之心

安乎謂

孔子生未嘗為諸侯六卿亦豈所固有此乃本之
宋臣王安石謂史記不當列

孔子於世家不過文人翻新立說豈足據為定論
且天子尊師所貴宣明德化敬叙彝倫實能行聖
道以端治理明聖教以淑人心坐而言起而行使
天下無一人不與被聖人之澤至於樂舞之儀文
籩豆之度數其末節耳而以此為尊師首務豈所

謂能知輕重者乎又所稱兩廡先賢先儒位次凌躐宜請釐正一條兩廡從祀諸人累朝互有出入蓋書生習氣喜逞臆斷而訾典章其一偏一曲之見言人人殊考之前史甚至有迎合時事黨護鄉曲者漢臣議禮如聚訟之譏良有以也阮學浩所信者閻若璩之說而閻若璩此條如何釐正若者宜先若者宜後在閻若璩即無定論況

孔廟祀典於雍正二年奉

皇考世宗憲皇帝諭旨令廷臣集議所有應增祀復祀
之先賢先儒已經一一釐正閻若璩所謂西多於
東者蓋未釐正以前之舊今定從祀東廡六十二
人西廡六十一人位次秩然初無凌躐現載大清
會典閻若璩固未及見阮學浩何備官而亦未之
聞耶祀典關係重大若祇憑其私心淺見率議更
張忽進忽退忽東忽西成何政體以朕觀之此二
條即不可施行是以明切曉諭令衆知之其餘各

條或有應議之處大學士會同該部詳議具奏

乾隆十八年

諭太常寺春秋釋奠例應遣官朕自往歲恭謁

孔廟行禮後已閱五年仰止宮牆心殷景慕此次
親詣行禮

崇聖祠遣史貽直行禮

乾隆三十二年

諭內閣太學

文廟前經改用黃瓦楹桷鼎新迄今閱年已久宜
重加丹雘式煥宮牆著交現在派修宮殿工程處
諏日鳩工敬謹繕葺用副朕重道右文至意

又

諭內閣戴第元奏請增

至聖誕辰祭祀一摺殊非正理誕辰之說出於二
氏為經傳所不載國家尊

師重道備極優崇釋奠二丁自有常制援據禮經

實不同於尋常廟祀且昔人於

孔子生日辨論紛如尤難臆定況

孔子儒者之宗也尊

孔子者當即以儒者所聞

孔子之道尊之戴第元乃欲於彛典之外輕增一
祭轉為褻越而不足以昭隆禮士不通經所奏宜
擯摺發還

乾隆三十三年

諭內閣修葺

文廟現屆落成太學規模式昭輪奐惟門題殿榜
尚應詳考彝章用肅景仰向來正殿稱

先師廟二門曰廟門而大門未有書額蓋沿習明
代舊文未加釐正夫廟門之號於禮經所稱祖廟
既涉嫌疑而

先師廟額揭諸殿楹名實尤多未稱應於大門增
先師廟額其正殿改為大成殿二門改為大成門

庶符會典定制朕親書榜字涓吉恭懸以彰崇道尊

師之至意

又

諭內閣國學崇祀

先師規制法程美備是飭我

列聖右文重道尊禮有加朕臨御初卽詔易黃瓦儀惟其隆邁以殿廡歲久弗葺特發帑金二十餘萬鳩

元鼎新勅大臣董厥成輪奐視舊增益工就告歲
而門殿諸額向沿明張璠陋議非所以肅觀瞻明
折中也既依會典定名躬為榜書並宣示釐正大
指茲復親製碑記具修建原委且於幾暇手書付
鋟表示鄭重將以明年仲春詣學釋奠落成之彰
盛典焉遐稽

闕里廟堂有後漢時犧象諸尊以為觀美爰擇內
府所藏周範銅鼎尊百壺簠簋爵洗各一頒

置太學陳之

大成殿中用備禮器夫

孔子志在從周楹間列姬朝法物於義惟允所司
其敬凜將事典守勿替以克副朕意

欽定國子監志卷一

欽定四庫全書

欽定國子監志卷二

聖諭二

訓示

世祖章皇帝諭旨

順治九年

勅諭國子監祭酒司業等官

聖人之道如日中天上資之以圖治下學之以事君

爾等當嚴督諸生盡心訓誨諸生當敬奉師教身體力行教有成效時惟師長之功學有實用方盡弟子之職如訓導不嚴怠肆失學爾師生俱難免咎尚其勉之

又

訓示生員曰朝廷建立學校選舉生員免除丁糧厚以廩糈設祭酒司業及廳堂各官以教之各衙門官以禮相待全要養成賢才以供朝廷之用諸生皆當上

報國恩下立人品所有教條開列於後

一生員之家父母賢智者子當盡孝父母愚魯或有
非為者子既讀書明理當再三懇告使父母不陷於
危亡

一生員立志當學為忠臣清官書史所載務須互相
講究凡利國愛民之事更宜留心

一生員居心忠厚正直讀書方有實用出仕必為良
吏若一味邪刻讀書必無成就為官必取禍患行害

人之事者往往自殺其身常宜思省

一生員不可干求官長交結勢要希圖進身若果心善德全上天知之必加以福

一生員當愛身忍性凡有司官衙門不可輕入即有切已之事止許家人代告不許干與他人詞訟他人亦不許牽連作証

一為學當尊敬先生若講說皆須誠心聽受如有未明從容待問毋得蓄疑為師者亦須盡心教訓勿致

怠惰

一軍民一切利病不許生員上書陳言如有一言建
白以違制論黜革問罪

一生員不許糾黨多人立盟結社把持官府武斷鄉
曲所作文字不許妄行刊刻違者聽提調官治罪

諭旨恭勒卧碑於太學門左

謹案

順治十六年

諭入監官生滿洲官員子弟有願讀清書或讀漢書及

漢官子弟有願讀清書者俱送入國子監仍設滿洲
司業助教教習清書

聖祖仁皇帝諭旨

康熙八年

勅諭國子監祭酒司業等官朕惟

聖人之道高明廣大昭垂萬世所以興道致治敦倫
善俗莫能外也朕纘承丕業文治誕敷景仰

先聖至德令行辟廱釋奠之典將以鼓舞人材宣布

教化爾監臣當嚴督諸生潛心肄業諸生亦宜身體力行朝夕勤勵若學業成立可裨實用則教育有功其或董率不嚴荒乃職業爾師生難辭厥咎尚其勉之毋忽

康熙九年

諭吏部兵部向來包衣佐領下官員子弟不准為廕生監生其筆帖式無有品級今恐內外官員効力相同加恩豈宜有別包衣佐領官員子弟准為廕監及筆

帖式給與品級之處爾部定議具奏

謹案部臣遵議包衣下一品官子弟許其承廕二品至四品各廕一子入監讀書

康熙二十一年

諭大學士等國子監乃國家養育人材之所近聞司教之官不將監生嚴加約束教誨縱之游戲又其甚者開雜之徒任行出入竟以國子監為游戲之地矣爾等傳諭祭酒司業等官嚴行禁止

康熙二十三年

諭吏部助教官員職掌教習廕監官生應選優於文學者補用若用文學庸劣之人何以表率生徒以後著吏部考取仍將試卷送內閣閱看具奏

康熙二十七年

諭禮部琉球國送到陪臣子弟三人入監讀書著安著得所

康熙三十二年

諭教習八旗官生幼童等幼童惟在訓迪苟加意教誨

未有不成者騎射與文字原宜並重不可偏廢滿洲
通文義官員即用之行間未嘗不可近見國子監教
習官學生甚屬委靡大不及前即八旗教習幼童亦
皆懈怠現在八旗幼童務宜選擇良師勤加訓誨爾
等傳諭知之

康熙五十一年

諭禮部訓飭士子文若令各府州縣學宮一體勒石恐
有不產石州縣地方或致借端擾派俟國子監勒石

後以揭本彙頒各省轉發所屬各學

康熙五十二年

諭王大臣未入八分公以下鎮國將軍輔國將軍及宗
室內為一二品大臣者俱准給廕生其廕生入監讀
書之後即令隨旗行走

世宗憲皇帝諭旨

雍正二年

諭禮部等衙門通年文教廣被由我

聖祖仁皇帝壽考作人六十年来山陬海澨莫不讀書
稽古直省應試童子人多額少有垂老不獲一衿者
其令督撫會同學臣查明實在人文最盛之州縣題
請小學改為中學中學改為大學大學照府學額數
取錄督撫等務宜秉公詳查不得徇私冒濫至鄉試
解額

聖祖仁皇帝屢次增廣乙酉戊子等科復於額外加中
五經三名至五十六年而罷以其久而滋弊也嗣後

各學臣及祭酒司業於錄科時先加面試主考閱文
果佳本監加中四名直隸各省大小不一某省應加
中幾名著分別詳議定數具奏如無佳文寧缺勿濫
會試臨時請旨本監貢生監生本科鄉試中式著加
增十八名朕臨雍講學雖率由舊章然必期於世道
文教有益不蹈一切虛文諸生其各欽遵時

世宗憲皇帝舉臨雍大典行聖公次子侯襲五經博士

孔繼溥暨五氏後裔來京陪祀

上召見

諭曰爾等皆是聖賢後裔與衆不同然身為聖賢後裔之身必心為聖賢後裔之心恪守先聖先賢之訓方為不愧朕詣學大典爾等遠來特行召見願爾等慎修厥德以繼家聲勉之勉之

又

勅諭國子監祭酒司業等官朕惟

聖人之道昭揭日月彌綸天地萬世帝王下逮公卿

士庶罔不仰遵成憲率由教言我國家尊崇

至聖遠邁前代朕續承大統古訓是學惟日孜孜茲
雍正二年三月朔日親詣辟廱祇謁

先師孔子行釋奠禮思以鼓勵羣英正隆文治爾監
臣宜嚴督諸生善為導誘爾諸生亦當殫心肄業實
踐躬行秉端方以立身敦忠孝以興誼勿營奔競勿
事浮華文必貴乎明經學務期乎濟世俾品成詣進
以副朕教育至意此爾多士之休亦惟爾監臣董率

之功也慎勿怠荒職業以貽爾羞諸師生其共勉之
故諭

又

諭禮部工部國子監進士題名之典始於唐時新進士
榜後於慈恩寺塔下題名立碑自宋時以至我朝皆
建碑於國學按諸進士甲第先後刻載姓名籍貫於
上所以重科名也今太學

聖廟戟門外所立本朝歷科題名碑自順治丙戌科

起至康熙戊戌科而止稽之會典諸進士釋菜後禮部題請工部給建碑銀一百兩交與國子監立石題名康熙三年輔政大臣裁省自後每科諸進士各自捐資立石我國家振興文教凡鄉試會試動用帑金數萬朕即位之始即開恩科誠以科目一途實用人取士之所係題名之典豈宜缺焉著工部動用正項錢糧令國子監將雍正癸卯甲辰兩科題名碑記速行建立康熙辛丑科亦宜補建嗣後每科仍照舊例

題請庶士子觀覽此碑知讀書之可以榮名益勵其
潛修上達之志爾該衙門即遵諭行

雍正四年

諭內閣助教一官有教訓士子之責若只考試繕寫則
年少淺學但工寫字者皆可入選何能得人可傳諭
各部院衙門將滿字筆帖式內為人老成有品行者
保舉引見其應考繕譯者仍照例考試

雍正五年

諭禮部直省拔貢舊例十二年題請舉行一次後因各省學政不能兼公選取國子監未便照例請行於雍正元年特行一次朕思各州縣每年歲貢較其食廩淺深挨次出貢內多年力衰邁之人欲得人材必須選拔著各省學臣於科考時照例府學拔取二名州縣學拔取一名寧缺勿濫務期學問優通行端方才猷可用之人令其來京朕將親加考驗令入國子監肄業如有學問荒陋人品不端才具庸劣者將該

學政嚴加議處嗣後六年選拔一次國子監屆期題請候旨

雍正六年

諭禮部各省考取拔貢原欲遴選儒生以宏教育向來之例俱於現考一二等生員內擇其文行兼優者以爲選拔但恐作文有一日之長短而文理平通不列優等者其人或品行端方才識練達足備國家之用亦未可定若但論文去取則此等之人難以入選嗣

後著各省學政不必拘一二等之生員俱准收考酌
量試以時務策論其人果有識見才幹再訪其平日
品行端方即正考未列優等亦准選拔伊到成均肄
業仍可學習如此則文行兼收可以昭國家廣攬人
材之典

雍正七年

諭內閣八旗之貢監生員已經考取小京官筆帖式者
若願就鄉試俱准其與舉子等一同入場使片善寸

長不致遺棄以副國家教養人材之典

又

諭禮部各省拔貢聞已陸續來京伊等既不能應本省鄉試則當准其應試北闈俾得觀光盛典凡拔貢之有貢單者俱著該部咨送順天府令其應試再修書各館內從前有外省生員在館効力者若情願入場考試著取同鄉京官印結保送順天府亦准入場

旨准拔貢等取具同鄉主事等官印結仍由國子監查

謹案是年監臣遵

明錄科移送
順天府鄉試

雍正八年

諭吏部向來各處鹽政弊端甚多累民蝕課難以清楚
多因鹽場大使不得其人之所致是以定議於候補
候選知縣等員之內揀選命往令司大使之事比時
該部因人員不敷揀選遂將監生捐納職銜之人亦
入於揀選之內今行之二年衆人漸起鑽營之念聞
有央求同鄉京官出結而私相餽送者此風斷不可

長嗣後鹽場大使之缺到部止准於候補候選人員
內揀選引見不必用捐納職銜之人倘或候補候選
人員不敷著將在部學習之人及留京之拔貢生令
該部堂官及國子監祭酒等擇其為人謹慎有身家
可以辦事者保送吏部以備揀選

又

諭內閣各省選拔生員到京朕俱特派大臣秉公考試
分別等次進呈前據閱卷大臣奏稱湖北一卷文理

荒疎請交部議後經部議革去選拔甚是及查其姓名則湖北應山縣生員楊可鏡也頃朕聞楊可鏡係明臣楊漣之元孫楊漣之子楊之易為江南松江府同知於順治四年遭松江府提督吳勝兆之叛捐軀殉難忠節凜然比蒙

世祖章皇帝之恩優加贈卹此即楊可鏡之曾祖也朕思楊漣父子兩世忠義其後嗣子孫若稍能自立品行無虧雖文義不工亦當格外造就該學政將伊入

於選拔之內未必不因此起見但不將緣由奏明是其辦事無識無才之處耳楊可鏡准作選拔赴國子監肄業仍著禮部帶領引見

雍正九年

諭內閣朕欲於在京官員人等內揀選老成明白者數十員命往陝西內地州縣辦理宣諭化導之事年餘可竣即著回京辦理若好加恩議叙著大學士會同該教習於庶吉士內揀選數員各部堂官在本部學

習人員內揀選一二十員國子監祭酒等在選拔貢生內揀選二三十員俱交送內閣帶領引見

謹案時監臣遵旨揀選拔貢生三十名引

見協同庶吉士前往陝西宣諭化導

雍正十三年

諭禮部據國子監祭酒覺羅吳拜邵基奏稱直省貢監生錄科時無論有無本籍地方官文書請俱令取具同鄉京官主事以上印結等語朕思各省地方大小

不同在京同鄉官員有無多寡不能一轍若錄科時
槩令取具同鄉京官印結其中遠省貢監生無熟識
之同鄉京官何從覓取印結勢必啓抑勒鑽營之弊
所奏尚未允協此事原係給事中王瓚條奏在伊諒
有所見著吳拜邵基會同詳細妥議具奏

謹案覺羅吳拜等遵議嗣後鄉試不在監肄業
之貢監生無論遠近省均取本地方官印結到
監方准收考在京新捐貢監
增聽取同鄉京官印結收考

皇上諭旨

乾隆元年

諭禮部凡由捐納候選之貢監舉人例不得與鄉會
試從前事例內有捐應鄉會試一款今捐例已概
行停止此等貢監舉人有志科名者勢皆不得援
例與試矣朕思此等人員尚在需次選曹與既登
仕籍者有間不得因捐貲候選屏諸場屋之外直
隸各省貢監生捐官願與鄉試舉人捐官願與會
試者准令一體考試以示鼓舞人材之意

乾隆三年

皇上舉臨雍大典行聖公孔廣孫暨十三代後裔來

京陪祀

上命尚書任蘭枝孫嘉淦帶領引

見

諭曰爾等皆聖賢後裔因朕臨雍來京特行召見爾等既為聖賢之後即當心聖賢之心凡學聖賢者非徒讀其書而已必當躬行實踐事事求其無愧

方為不負所學況身為聖賢子孫尤與凡人不同
若不能實加體驗徒驚讀書之名實與祖德家風
不能無忝爾等務須勤思勉勵克紹先傳以副朕
諄切期望之意

又

勅諭國子監祭酒司業等官仰惟我朝
列祖以聖人之道治天下用開太平洪業

聖祖

世宗重道隆

師超越百代作人造士化洽寰區朕嗣守丕基勤
求至道思所以廣勵學宮祇紹

前烈越乾隆三年三月二日親詣辟廱釋奠於

先師孔子升堂進講嘉與諸生闡明聖教之本原
帝治之盛軌夫端教術育賢才厥惟師儒之功正
身心修德業以為國家之用諸生其可弗勉哉詩
曰古之人無斃譽髦斯士放勲曰使自得之又從

而振德之我

祖宗教澤涵濡薰陶長養百年於茲正學昭明揭若日月爾監臣欽承至訓振作而鼓舞之罔有怠斁諸生率乃攸行敦本務實希賢希聖夙夜罔愆俾國家文治光裕於億萬年懋哉懋哉特諭時十三氏後裔凡三十一人陪祀又

諭禮部觀禮三十一人俱准入監讀書國子監本科鄉試照雍正二年例廣額十八名

又

諭內閣從前奉

世宗憲皇帝諭旨將

聖祖仁皇帝御刻經史諸書頒發各省布政司敬謹刊
刻准人印刷并聽坊間刷賣原欲士子人人誦習
以廣教澤也近聞書板收貯藩庫士子及坊間刷
印者甚少著各撫藩留心辦理將書板重加修整
俾士民等易於刷印有願翻印者聽其自便無庸

禁止如

御纂諸書內有為士人所宜誦習而未經頒發者著該督撫奏請頒發刊板流布至於武英殿翰林院國子監皆有存貯書板亦應聽人刷印並從前內府所藏各書如滿漢官員有願購覓誦覽者概准刷印其如何辦理之處著禮部會同各該處定議請旨曉諭遵行

乾隆五年

訓飭太學士子及司訓等官成均課士之道惟貴躬行實踐不在多立科條如視為具文雖再增條款又復何補是惟在國子諸生自知龜勉則古稱先務為明體達用之儒勿役役於祿位功名之念而司訓課之責者又復善為誘掖切加勸懲則辟廱鐘鼓教化聿興而珪璋特達之士亦從此輩出矣

又

諭內閣士為四民之首而太學者教化所先四方於

是觀型焉比者聚生徒而教育之董以師儒舉古
人之成法規條亦既詳備矣獨是科名聲利之習
深入人心積重難返士子所為汲汲皇皇者惟是
之求而未嘗有志於聖賢之道不知國家以經義
取士使多士由聖賢之言體聖賢之心欲使之為
聖賢之徒而豈沾沾焉文藝之末哉朱子同安縣
諭學者云學以為己今之世父所以詔其子兄所
以勉其弟師所以教其弟子弟子之所以學舍科

舉之業則無為也使古人之學止於如此則凡可以得志於科舉斯已爾所以孜孜焉愛日不倦以至乎死而後已者果何為而然哉今之士唯不知此以為苟足以應有司之求矣則無事乎汲汲為也是以至於情遊而不知返終身不能有志於學而君子以為非士之罪也使教素明於上而學素講於下則士者固將有以用其力而豈有不勉之患哉諸君苟能致思於科舉之外而知古人之所

以為學則將有欲罷不能者矣觀朱子此言洵古今通患夫為己二字乃入聖之門知為己則所讀之書一一有益於身心而日用事物之間存養省察開然自修世俗之紛華靡麗無足動念何患詞章聲譽之能奪志哉況即為科舉亦無碍於聖賢之學朱子云非是科舉累人人累科舉若高見遠識之士讀聖賢之書據我所見為文以應之得失置之度外雖日日應舉亦不累也居今之世雖孔

子復生也不免應舉然豈能累孔子耶朱子此言
即是科舉中為己之學誠能為己則四書五經皆
聖賢之精蘊體而行之為聖賢而有餘不能為己
則雖舉經義治事而督課之亦糟粕陳言無裨實
用浮偽與時文等耳故學者莫先於辨志志於為
己者聖賢之徒也志於科名者世俗之陋也國家
養育人材將用以致君澤民治國平天下而囿於
積習不能奮然求至於聖賢豈不謬哉朕膺君師

之任有厚望於諸生適讀朱子書見其言切中士
習流弊故親切為諸生言之俾司教者知所以教
而為學者知所以學

乾隆十一年禮部疏請拔貢生驗到即會同國
子監考試文理通者准為貢生留監肄業經侍
郎管監事德沛奏肄業貢監向有額缺若准貢
之人一概留監不免人浮於額請一體考到考
驗錄取肄業

諭禮部所奏拔貢廷試一事朕已降旨依議嗣後禮部國子監務須秉公考試其留監肄業者與每年相較不得加於從前之數任意濫收著禮部國子監存記

又

諭內閣國子監祭酒為成均司鐸之長有造就人才之責著吏部將應行開列及其次應陞人員一併帶領引見

謹案嗣是漢祭酒員缺部臣以開列應陞之員
引

見請

旨簡用定為例

乾隆十九年

諭內閣國學以課訓士子為職現任國子監祭酒武
極理係繙譯進士出身不宜司教之任著以對品
京堂缺補用

謹案嗣是滿祭酒員缺繙譯進
士出身之員遂得開列之例

乾隆二十三年

諭禮部國家設立學校原欲教育人材乃自設立義學以來不過僅有設學之名而無教育人材之實且既設有咸安宮國子監官學復加恩於左右兩翼各設教訓世職官學則八旗有志讀書者儘可於此等官學內肄業似此有名無實之義學適足為貽誤旗人之地所有義學著即行裁去

乾隆二十六年

諭禮部各處教習三年期滿引見並無一二等之分

惟國子監有之此例徒足開士子捷徑於實政殊
無裨益將謂一等者為優則該列在二等者初不
謂之劣而一則歸本班銓選一則留學以知縣即
用且留學三年既以知縣即用而又預為聲明遇
揀發時一體挑選是名為學校收課士之效而實
為上下其手啟速化之門耳於教學用人俱無實
濟嗣後此例著停止毋復滋僥倖其如何詳定章
程之處該部議定具奏

欽定四庫全書

卷二

謹案時部臣遵

旨議覆嗣後教習期滿出具考語帶領引

見恭候

欽定以知縣教職用毋庸分別等第亦毋庸留學三年

乾隆四十八年

諭內閣稽古國學之制天子曰辟雍所以行禮樂宣
德化昭文明而流教澤典至鉅也此次釋奠禮成
念國學為人文薈萃之地規制宜隆而辟雍之立
自元明以來典尚闕如自應增建以臻美備著派

禮部尚書德保工部尚書兼國子監劉墉侍郎德成敬謹前往閱視度地鳩工諏吉興建落成之日朕將舉行臨雍典禮以昭久道化成之盛

乾隆四十九年

諭內閣稽古明倫設教典重學官國學為首善之區橋門觀聽規制尤宜隆備前命尚書劉墉德保金簡侍郎德成鳩工庀材興建辟雍現在已屆落成朕於明年仲春釋奠禮成即臨雍講學所有應行

典禮著各該衙門詳議具奏

欽定國子監志卷二